



Sesida dals

Communitgà ils

Protocol nr.

7 da zercladur 2016

8 da zercladur 2016

549

Incumbensa Müller

concernent il sviament da Susch

Resposta da la regenza

La regenza è conscienta da la gronda impurtanza e da las consequenzas che sviaments han. Pervia da quai ha il chantun Grischun gia realisà bleras vias da sviament ils ultims decennis.

Er conscienta è la regenza da la situaziun da traffic problematica sin il traject da la via d'Engiadina entaifer il vitg da Susch. Il sviament da Susch è perquai er vegnì inditgà en il program da construcziun da vias 2017-2020 – sper ils sviaments da La Punt-Chamues-ch e da Sta. Maria V.M. – sco in dals ulteriurs projects pussaivels suenter l'avertura dal sviament da Silvaplauna ch'è actualmain en construcziun. Correspudentamain ha l'uffizi da construcziun bassa cumenzà cun la projectaziun. En in'emprima fasa èn vegnidas elavuradas ed examinadas variantas pussaivlas. I sa tracta en quest connex da las variantas descrittas en l'intervenziun qua avant maun. Actualmain vegnan cumparegliadas las variantas e vegn fixada la meglra da quellas. Cur che quella è fixada, duai vegnir elavurà il project d'exposiziun cun in rapport davart la cumpatibilitad ecologica. Pervia da las pussaivladads da protesta n'èn retardaments betg exclus, uschia ch'i na pon betg vegnir fatgas prognosas areguard ils termins.

Uschenavant che la regenza vegn ultra da quai incumbensada d'adattar la pratica per l'acquist da terren, stoi vegnir resguardà ch'ina nova pratica sto correspunder a la constituziun ed a la lescha. Expropriaziuns e restricziuns da la proprietad, che correspundan ad in'expropriaziun (expropriaziuns materialas), ston vegnir indemnizadas cumplainamain tenor l'art. 26 al. 2 da la constituziun federala (Cst.). D'ina tala expropriaziun na dastga resultar ni ina perdita ni in gudogn per la persuna expropriada.

Il legislatur chantunal ha repetì quest princip en l'art. 9 da la lescha d'expropriaziun dal chantun Grischun (LExpr) e concretisà las cumponentas da l'indemnisaziun en l'art. 10 LExpr. Tenor quel ston vegnir indemnisadas la valur commerziala cumplaina, la valur reducida, sch'i vegn exproprià mo ina part d'in bain immobigliar, ultra da quai – sut tschertas circumstanças – ina part adequata vi dals custs da reacquisiziun sco er incunvegnientschas. L'adattaziun da la pratica per l'acquist da terren, che vegn postulada en l'incumbensa, en furma d'ina regulaziun excepziunala per pussibilitar projects da vias pli favuraivels chaschunass ina indemnisaziun supplementara che surpassa l'indemnisaziun d'expropriaziun cumplaina garantida en ils art. 26 al. 2 Cst. e 9s. LExpr. Ina tala indemnisaziun supplementara premettess in'adattaziun da la lescha d'expropriaziun dal chantun Grischun. La regenza è però da l'avis che quai na saja betg necessari.

Tenor il tribunal federal (DTF 127 I 185) na scumonda la garanzia da la proprietad tenor il dretg federal betg als chantuns d'indemnisar – en connex cun expropriaziuns chantunalas formalas – dapli ch'il donn a las personas expropriadas e pia da pajar indemnisaziuns che surpassan la limita d'ina indemnisaziun cumplaina. En quest connex sto però la concepziun legala d'ina eventuala cumpensaziun che surpassa l'indemnisaziun cumplaina tenor l'art. 26 al. 2 Cst. correspunder al princip da l'egualitad giuridica e permetter l'applicaziun en moda nunarbitraria. Questa pretensiun na vegn però betg ademplida cun la soluziun che vegn formulada e prendida en mira en l'incumbensa, numnadamain ina regulaziun excepziunala per pussibilitar projects da vias pli favuraivels (cf. en general en quest connex VALLENDER, St. Galler Kommentar tar l'art. 26 Cst., cifras marginalas 72 ss.).

En il senn da las explicaziuns preschentadas è la regenza pronta d'acceptar l'incumbensa per realisar uschè svelt sco pussaivel il project per ina via da sviament da Susch, e propona dentant da refusar l'incumbensa en quai che concerna l'adattaziun da la pratica per l'acquist da terren.



En num da la regenza

Il president:

Il chancelier:

Dr. Chr. Rathgeb

Dr. C. Riesen